



Bentiaraq Ottosen

UPA 2026/157

Atassut

17. Juni 2026

Angajoqqaat meeraasa amerlassusaat naapertorlugu akileraartarnikkut ilanngateqalerunik inuiaqatigiinni amerliartuaarnissamat iluaqutaasinnaanersoq pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Aqqalu C. Jerimiassen, Atassut)

Siullermik qutsavigerusupparput Atassutip siulittaasua Inatsisartunut Ilaasortaq Aqqalu C. Jerimiassen, oqallinnissamik pingaarutilimmik siunnersuummik qaqitsineranut.

Atassutip politikikkut tunngavigisaa tassaavoq Ilaqutariit inuiaqatigiit akornnani toqqammaviunerat. Atassutip pingaartitaraa nunatsinni ilaqutariineq nukittoq aammalu ilaqutariinermik politikki sukarsuut pingaarnersarigaat.

Meeqqat pitsaasumik toqqissisimasumillu peroriartortinneqarnissaat inuiaqatigiinnut tamarmiusunut aningaasaliineruvoq pitsaasoq, angajoqqaat tamanna akisussaaffik annerpaaq tigummivaat meeraq toqqissisimasumik peroriartornissaanut toqqammaviliisallutik. Siunissami pingaaruteqarpoq innuttaasut sulisinnaasut, akisussaassuseqartut inuiaqatigiinnullu tunniussaarsinnaasut pilersinneqarnissaat. Tamanna Atassutip politikikkut isumaa naapertorlugu Ilaqutariinikkut politikkeqarnissaq ersarissumik pingaaruteqartoq oqariartuutigaarput.

Tamanna tunngavigalugu angajoqqaat meeraasa amerlassusaat naapertorlugut akileraartarnikkut ilanngateqartalernissaat Atassummiit pitsaasumik ineriartortitsinissamat sakkussatut isigineqarpoq. Siunertaq tassaavoq ilaqutariit aningaasatigut oqilisaavigineqarnissaat, meerartaqarnermut aningaasartuutit annertuut eqqarsaatigalugit.

Meeqqanik perorsaaneq aningaasartuuteqarfiungaatiarsinnaasarpoq, nerisaqarneq, atissat, ilinniarneq, sunngiffimmi sammisassat, ineqarneq peqqinnissarlu tamarmik angajoqqaanut akisussaaffiupput. Taamaattumik meeqqanut amerlanerusunut akisussaaffeqartut akileraartarnikkut ilanngateqartinneqarsinnaappata, aningaasaqarneq ilaqutariit akornanni pitsaanerulersinnaavoq, ulluinnarnilu pisariaqartitat pitsaanerususumik naammassineqarsinnaallutik.

Atassutip isumaa naapertorlugu akileraarutit appasinnerusut innuttaasunut namminneq aningaasaatitit qanoq atorneqassanersut pillugit annertunerususumik aalajangiisinaanerat nukittorsarneqarsinnaavoq. Tamanna kiffaanngissuseqarnermik akisussaassuseqarmillu tunngaveqarpoq.

Aammattaaq ilanngateqartitsisarneq inuiaqatigiinni inunngortartut amerliartornissaanut kajumissaatit atorneqarsinnaavoq. Kalaallit Nunaanni siunissami sulisussanik pisariaqartitsinera tunngavigalugu, innuttaasut imaluuniit inuiaqatigiit katitigaanerat unammillernartumiitillugu



aaqqiissutissaq pitsaasuusooq aallaavigineqarsinnaavoq. Utoqqaat nunatsinni amerliartorput, 2040-imilu sulisussameerneq annertunerpaasussaavoq. Taamaattumik pingaaruteqarpoq piareersarneq annertoq politikikkut aallarnerneqartariaqartoq, sulisinnaasut aammalu avataaniit suliaartortunit pisariaqartitsinerup killilersimaarnissaa anguneqassappat. Meeqqat amerlanerusut siunissami sulisussat nangitsisussaraagut, inuussutissarsionnikkut ilinniartitaanikkullu pitsaasumik aallartinnissaq pingaaruteqartoq oqariartuutigissavarput. Taamatulli akileraartarnikkut pilersitsisinnaavugut aningaasaqarneq patajaatsoq eqqarsaatigalugu, tamannalu aningaasaqarneq patajaatsoq iluaqutsersuisinnaasaaq.

Atassutip aamma isumaqarfigaa inuussutissarsionnikkut siuariartornissaq pillugu akileraartarnikkut inuiaqatigiit akornanni oqilisaassinissaq, inuit upperigatsigit kiffaangissuseqarlutik akisussaassuseqartut. Taamaattumik innuttaasut aningaasaatik amerlanerusut tigummiinnarunikkit, pisiniarnermut, sullissinermut, namminerlu illuuteqarnermut aningaasaliinissamut atorneqarsinnaanerata ersersinneqassaaq. Tamanna suliffeqarfippassuarnut namminersortunut isertitaqarnerulernermik kinguneqassaaq, suliffissanillu patajaatsumik nutaanik pilersitsinissamut periarfissiilluni ineriartorfiussaaq.

Ilaqutariit nukittuut inuiaqatigiinnik nukittuumik pilersitsisarput. Angajoqqaat aningaasaqarnikkut pitsaasumik inissisimagaanngata meeqqat piffissaqarfigineqarnerusarput, kisiannili pingaaruteqarpoq ilaqutariit ikiorsertariallit aamma tamatumingga isiginiarneqarnissaat. Tassuunatigut ilaqutariit akornanni naleqarnerulersitsinermik kinguneqassaaq, inuk kinaluuniit naleqarmat. Tamanna meeqqanut ataasiakkaannut iluaqutaassaaq saniatigut inuiaqatigiit ataatsimut peqatigalugit iluaqutsiisalluni, kinguaariillu tullii ilinniarluarsimasut, peqqinnerusut inuiaqatigiinnullu peqataalluurtut pilersinneqassapput.

Atassutip anguniagaraa pisortat aningaasaqarnerata aammalu innuttaasut namminneq periarfissaasa akornanni oqimaaqatigiinneq. Taamaattumik akileraartarnikkut ilaangaateqartitsinerit ilaqutariinnut sammitinneqartut inuiaqatigiit aningaasarsiornerannik, inunngortartunik amerlisaanermik atugarissaarnerullu nukittorsarneqarneranik ataatsikkut tapersuisinnaasutut isigineqarput.

Naggasiullugu Atassutip ersesinniarpaq ilaqutariit inuiaqatigiinni pingaarnerpaamik naleqartitaasut ilagigaat. Meeqqanut aningaasaliineq tassaavoq Kalaallit Nunaata siunissaanut aningaasaliineq, angajoqqaallu meeqqaminnik perorsaanermi akisussaaffimmik tiguisut politikikkut aamma aningaasaqarnikkut tapersorsorneqanissaat naleqquttuusooq isigineqarluni.

Qujanaq oqallilluarisi.